



Publicaziuns dalla vischnaunca, jamna 47

Lubientschas da baghegiar

L'istanza da baghegiar ha concediu suandonta lubientscha da baghegiar:

Nr. 2023-1069.000

Christian & Maria Gabriela Eberle, Zollikerstrasse 227, 8008 Zürich; installaziun d'ina nova pompa da calira d'aria, parcella 3920, Via Curtins 5.1, 7186 Segnas.

Nr. 2023-1077.000

Gian Linard e Tamara Marquart, Försterweg 7, 9472 Grabs; construcziun d'ina casa d'ina famiglia ed ina garascha, parcella 3963, Via Soliva 13, 7180 Disentis/Mustér.

Nr. 2023-1078.000

Carli Fry, Mülibach 37, 8852 Altendorf; nova cuvrida dil tetg entras in indrez fotovoltaic, parcella 114, Via Iert 2, 7186 Segnas.

Uffeci da baghegiar Disentis/Mustér

Annunzias da baghegiar

All'istanza da baghegiar ei sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziau ils suandonts projects:

Nr. 2023-2079.000

Cumpropietaris Via Latis, Marcus Jacomet, Via Latis 8, 7180 Disentis/Mustér; renovaziun dalla cuvrida dalla Via Latis, parcelas 575 e 2239, Via Latis, 7180 Disentis/Mustér.

Nr. 2023-2080.000

Mazlaria e sechentaria Lozza SA, Via Sursilvana 21, 7180 Disentis/Mustér; niev cundrez fotovoltaic sin tetg, parcella 890, Via Sursilvana 21, 7180 Disentis/Mustér.

Uffeci da baghegiar Disentis/Mustér



Cussegl da vischnaunca – Rapport dalla seduta dils 14 da november 2023

Il niev pei da taglia per la vischnaunca da Mustér munta naven digl onn 2024 a 99%

Mardis, ils 14 da november 2023 ha giu liug en halla Cons la 26avla seduta dil cussegl da vischnaunca dalla perioda d'uffeci 2021/2024. El center dalla seduta ei stau il preventiv 2024 e l'altezia dil pei da taglia. Il cussegl da vischnaunca ha approbau unanimamein il preventiv 2024 e decidiu da reducir pigl onn 2024 il pei da taglia sin las entradas e la facultad per 11% da 110% giu sin 99%.

Suenter liunga discussiun e differentas pintgas midadas ha il cussegl da vischnaunca sut l'egida dil **vicepresident dil cussegl da vischnaunca Ignaz Venzin** approbau unanimamein il preventiv communal 2024. Il preventiv 2024 dil quen da gudogn e sperdita siara cun in surpli da recavs (gudogn) da frs. 100'600.--. Plinavon quenta la suprastanza communal igl onn 2024 cun in'atgna finanziaziun (cash-flow) da frs. 1'118'100.-- (preventiv 2023: frs. 1'931'600.--) ed investiziuns nettas da frs. 7'219'000.--.

Suenter in'intensiva debatta ha il cussegl da vischnaunca decidiu ch'il pei da taglia sin las entradas e la facultad dueigi pigl onn 2024 vegnir sbassaus per 11% da 110% sin niev 99%. En connex cun sia strategia da taglia haveva la suprastanza communal proponiu da reducir il pei da taglia ils proxims sis onns annualmein per 2%. Quella proposta ha buca anflau sustegn. Il pei da taglia sin schischom resta ad 1.7. Sura resultat dil preventiv 2024 cuntegn la reducziun dil pei da taglia. Il preventiv 2024 vegn suttamess al referendum facultativ conform ad art. 21 lit. a dalla constituiun communal. Plinavon vegn il conclus dalla reducziun dil pei da taglia suttamess alla votaziun all'urna conform ad art. 32 lit. c dalla constituiun communal.

Referendum facultativ

A caschun da sia seduta dils 14 da november 2023 ha il cussegl da vischnaunca suenter haver fatg entginas midadas approbau unanimamein il preventiv 2024. Conform ad art. 21 lit. a dalla constituiun communal ei quella decisiun suttamessa al referendum facultativ. Il messadi tiel preventiv 2024 (incl. annexas) ei exponius per investa en casa communal (stanza nr. 10). Enteifer 20 dis dapi la publicaziun officiala han 80 votantas e votants la pusseivladad d'inoltrar enviars sura conclus il referendum e pretender ina votaziun dil pievel.

Suprastanza communal



Cussegl da vischnaunca

Il cussegl da vischnaunca seraduna **gievgia, ils 7 da december 2023**, allas 18.00 en Sala Peter Kaiser dalla Claustra Mustér.

Tractandas:

1. Protocol 26-2021/2024
2. Pendicularas Mustér SA: Contract da dretg da baghegiar e da servitud (messadi 44-2021/2024)
3. Agenda 2024 (messadi 45-2021/2024)
4. Ura da damondas (conform ad art. 44 dil regulativ da fatschentas)
5. Elecziuns:
 - 5.1 dil president ni dalla presidenta dil cussegl da vischnaunca per 2024
 - 5.2 dil vicepresident ni dalla vicepresidenta dil cussegl da vischnaunca per 2024

La presidenta dil cussegl da vischnaunca

Rimnada da rumien da casa – fasa da test

Per haver indicaziuns pigl avegnir havein nus ordinau ch'ei vegni rimnau duront ina perioda da test da treis jamnas naven diils **27-11-2023 entochen ils 15-12-2023** mo inaga ad jamna il rumien en nossa vischnaunca.

Nus supplichein l'entira populaziun da deponer futuramein il sac da rumien sulettamein els loghens defini persuerter (casettas da rumien e molocs).

Ils loghens tolerai entochen oz sper via vegnan sligiai per immediat.

Bien engraziament per Voss'enconuschientscha e cooperaziun en favur d'ina optimaziun dalla rimnada da rumien e diils cuosts persuerter.

Suprastonza communal

Secunda sentupada denter la giuventetgna e la suprastonza communal

La giuventetgna dalla vischnaunca da Mustér s'entaupa **sonda, ils 25 da november 2023** allas 17.00 cun la suprastonza communal en halla Cons. Ei dat ina discussiun davart la participaziun dalla giuventetgna en vischnaunca ed ina tscheina communal. A quella discussiun ein tut ils giuvenils denter 16 e 30 onns cordialmein envidai.

Annunzias prendin bugen encunter entochen venderdis, ils 24 da november 2023 allas 14:00 sut tcadruvi@disentis.ch ni 081 920 36 36.

Suprastonza communal



Revisiun parziala dalla planisaziun locala «Zona da mistregn cun habitaziuns pintgas» Exposiziun publica da cooperaziun

En applicaziun dil art. 13 dall'ordinaziun cantunala davart la planisaziun dil territori per il cantun Grischun (OPTGR) ha liug l'exposiziun publica da cooperaziun per ina revisiun parziala dalla planisaziun locala dalla vischnaunca da Disentis/Mustér.

Object:

Revisiun parziala dalla planisaziun locala «Zona da mistregn cun habitaziuns pintgas»

Acts d'exposiziun:

- Lescha da baghegiar (art. 29b)
- Plan da zonas e plan general da formaziun 1:2000

Annexas:

- Rapport da planisaziun

Termin da publicaziun:

30 dis naven dils 24 da november entochen ils 27 da december 2023

Liug e temps d'exposiziun:

Casa communal (stanza nr. 10), Via Cons 2, 7180 Disentis/Mustér durant las uras da spurtegl ni online [www.disentis.ch/downloads/exposiziun publica da cooperaziun](http://www.disentis.ch/downloads/exposiziun_publica_da_cooperaziun). Propostas motivadas per midar ni cumpletar ils mieds da planisaziun ein da far a scret entochen ils 27 da december 2023 (datum dil bul postal) alla suprastanza communal, Via Cons 2, 7180 Disentis/Mustér.

Suprastanza communal Disentis/Mustér

Affittaziun da pastira

Sin primavera 2024 vegn liber pastira che la vischnaunca da Disentis/Mustér sa affittar a cultivaders(a). Interessai han la caschun da mirar las parcelas che stattan a disposiziun per l'affittaziun sin [www.disentis/downloads/Affittaziun da pastira](http://www.disentis/downloads/Affittaziun_da_pastira). L'affittaziun succeda tenor art. 3 dalla lescha d'agricultura, numnadamein:

1. Las annunzias vegnan risguardadas tenor successiun da lur entrada.
2. Ei exista negins cunfins da vischinar denter ils uclauns dalla vischnaunca Disentis/Mustér.
3. Las pastiras vegnan fittadas tenor ils suandonts criteris:
 - al menaschi ch'ei geograficamein il pli datier dalla pastira affittabla;
 - sin fundament dalla surfatscha dalla pastira gia affittada e tenor grondezia dil menaschi reclamein ed en proporziun;
 - en cass da plirs interessents per ina pastira vegn tratg la sort.

Annunzias per l'affittaziun ein d'inoltrar a scret cun indicar las surfatschas giavischadas entochen ils **3 da schaner 2024** al departament d'agricultura, Via Cons 2, Caum postal 57, 7180 Disentis/Mustér. Per sclariment stat il gerau d'agricultura Clemens Berther (cultivaziun@disentis.ch) bugen a disposiziun.

Departament d'agricultura Disentis/Mustér

Seivs mobilas per la pasculaziun

Tenor art. 75, al. 1 dalla lescha da baghegiar ed art. 18 al. 1 dalla lescha d'agricultura ston tuttas seivs mobilas vegnir allontanadas sil pli tard treis dis suenter la pasculaziun. Quei vala era per seivs da gatter. Las seivs buc allontanadas vegnan pridas naven senza avisar ils pertuccai sin donn e cuost dil proprietari da terren. Nus supplichein da prender enconuschientscha da quei fatg e d'instradar las mesiras prescettas.

Uffeci d'infrastructura e baghegiar



Tagliar caglias e plontas

Tenor art. 75, al. 4 dalla lescha da baghegiar astgan plontas buca disturbar la vischinonza ni la segirtad publica. Per liung dallas vias publicas e privatas sco era sendas ein tuttas caglias e plontas da tagliar anavos, aschia che nuot survarga il cunfin (era buca suenter ch'ei ha neviu).

Quellas lavurs ston esser finidas sil pli tard entochen la fin da november 2023.

En cass che las caglias e plontas vegnan buca tagliadas anavos enteifer il termin fixau, vegnan quellas lavurs exequidas entras il menaschi tecnic dalla vischnaunca cun adossar ils cuosts als proprietaris.

Uffeci d'infrastructura e baghegiar



Pigniel da Nadal 2023

Il Menaschi tecnic dalla vischnaunca da Mustér organischescha uonn la vendita da pigneuls da Nadal. Ei vegn vendiu pignola mo sin empustaziun. Il pigniel sa vegnir retratgs ils **21 da december 2023** naven dallas 9.00 – 14.00 avon il luvratori dil Menaschi tecnic a Cuoz. Sin giavisch e per in prezi surpli da frs. 5.– vegn il pigniel era furnius avon casa.

Il pigniel sa vegnir empustaus cul talun aschuntau **entochen ils 8 da december 2023**:

Adressa:

Uffeci forestal Disentis/Mustér

Caum postal 57

7180 Disentis/Mustér

telefon 081 920 36 36

Mail: uflepp@disentis.ch

Talun d'empustaziun

Num: _____

Prenum: _____

Adressa: _____

Telefon: _____

Pégn (Rottanne) 1.10 – 1.50 m CHF 28.– tocs
 1.60 – 2.00 m CHF 31.– tocs
 2.10 – 2.50 m CHF 35.– tocs

Pégn da Nordmann 1.10 – 1.50 m CHF 43.– tocs
 1.60 – 2.00 m CHF 58.– tocs
 2.10 – 2.50 m CHF 80.– tocs

Pinar sez il pigniel da Nadal!

Igl uffeci forestal dat era uonn la pusseivladad a mintga habitont ni hosp da Mustér dad ir egl uaul a pinar gratuitamein il pigniel da Nadal giavischau. Il selvicultur communal accumpogna ils interessai e dat in ni l'auter cussegl.

Nus s'entupein cun resti cauld, buns calzers ed in resgiut **mesjamna, ils 20 da december 2023, allas 13.30.**

Il liug da sentupada vegn publicaus 4 dis avon sut; www.disentis.ch/uaul

Tagliar pignola en uauls da schurmetg, plontaziuns sco era ord seivs da schurmetg ei scumandau!

Per sclariment stat il selvicultur Simon Cathomen bugen a disposiziun.

Uffeci forestal Disentis/Mustér



Controlla da habitonts

Naschientschas

Tomás Faria de Sá, naschius ils 14 da november 2023, feagl da Helena Isabel Moreira de Faria e Bruno Filipe Pereira de Sá

Duarte Fernandes Mestre, naschius ils 17 da november 2023, feagl da Guerreiro Fernandes Mestre Inês Alexandra e Martins Mestre Alex

Administraziun communal Disentis/Mustér

Biblioteca populara Disentis/Mustér e contuorn

«Buchstart» – **Historias per affons pigns Mesjamna, ils 29-11-2023** allas 9.30 - 10.00 uras per mummas ni babs cun affons pigns da 1 entochen 4 onns.

Nus selegrein sin Vossa viseta.

Il team dalla biblioteca

Corporaziun d'aua Spina da Vin, Disentis/Mustér

Invitaziun alla radunonza generala extraordinaria dalla Corporaziun d'aua Spina da Vin, mardis, ils 28 da november 2023 allas 20.00 en halla Cons, Disentis/Mustér.

Tractandas

1. Beinvegni
2. Elecziun da dus dumbravuschs
3. Preventiv 2024
4. Projects 2024
5. Orientaziuns
6. Varia

Tuttas commembras e tuts commembers ein cordialmein envidai e beinvegni.

Per la suprastonza, il president: Aluis Flepp

Wollnahme Swisswool, Herbst 2023

Baubarit Segnas, Samstag, 25.11.2023, 8 - 12 Uhr
Untere Surselva bis Trun/Vals/Lumnezia, 13 - 16 Uhr
Obere Surselva, Berther Marcus, 078 684 74 30

Invitaziun SENIORA-CA

Gievgia, ils 30 da november 2023 allas 12:00 ell'AUA VIVA. Ad in gustus gentar en buna cumpignia per tuts seniors/tuttas senioras dall'entira vischnaunca da Mustér. Annunzia tochen mardis, ils 28 da november allas 11:00 a PUNTREIS sut 081 929 56 56. Gest indicar sche druveis transport. Partenza allas 11:30 naven da PUNTREIS.

Per ulteriuras informaziuns dat Linus Maissen, 079 423 01 37 bugen sclariment.

Cordial beinvegni

Team SENIORA-CA



Sontgaclau viseta ils seniors

Dumengia, ils 10 da december 2023 dallas 13.30 entochen las 15.30 en halla Cons.

Cun grond plascher envidein nus convischinas e convischins da 60 onns ensi alla tradiziunala sentupada cun Sontgaclau. Cun in pign program, la viseta dil Sontgaclau e tier caffè, te, vin cauld e pettas lein nus porscher a Vus in pèr emperneivlas uras en buna cumpignia.

Nus selegrein da passentar ensemen cun Vus in bi suentermiezdi.

Uniun da dunnas Mustér

Sentupada cun Sontgaclau pils affons pigns

Bimbimbim – Sontgaclau vegn cun stgalin! Dalla proxima seruschnada vegn Sontgaclau sin viseta. Nus envidein tut ils affons entochen quater onns ensemen cun fargliuns ed ina persuna carschida ad ina sentupada cun Sontgaclau sin plaz scola da Segnas. Suentar la viseta dat ei aunc in sitg cauld. **Mesjamna, ils 6 da december 2023** allas 9:45 plaz da scola Segnas-Artgin. Cuosts: 5.- per affon

Annunzias ein d'inoltrar entochen igl '1. da december tier Adela Bisquolm, 079 561 85 91 ni Carla Flury, 078 716 85 44.

Nus selegrein sin vossa viseta!

Uniun da dunnas Disentis/Mustér, ressort affons

Sentupada cun affons pigns e geniturs

Nus envidein cordialmein tut ils affons entochen treis onns (cun fargliuns e geniturs) da s'entupar, termagliar e paterlar.

Proxima sentupada mesjamna, ils 29 da november 2023 allas 9:30 - 11:00 en casa da scola Segnas, local artgin, ella 1. alzada. Prender cun marena e scalfins.

Cordialmein envida

Uniun da dunnas, ressort affons

Uniun da dunnas Disentis/Mustér

Viadi Fiera da Nadal Rapperswil

Gievgia, ils 14 da december 2023 mein nus sin viadi alla fiera da Nadal a Rapperswil. Nus mein dallas 10:44 naven da Mustér cun tren ed essan allas 21:11 puspei anavos. S'annunziar entochen ils 30 da november 2023 tier Leslie Flury, Tel. 079 504 62 95 ni zuest.leslie@gmail.com

Ausflug zum Weihnachtsmarkt Rapperswil

Am Donnerstag, 14. Dezember 2023 führt uns der diesjährige Ausflug an den Weihnachtsmarkt Rapperswil. Wir werden mit dem Zug um 10:44 Uhr in Disentis abfahren und um 21:11 Uhr wieder in Disentis sein. Anmeldung bis 30. November 2023 bei Leslie Flury, Tel. 079 504 62 95 oder zuest.leslie@gmail.com

Sentupada d'Advent a Segnas

Il vischinadi Segnas Mumpé Tujetsch envida cordialmein ad ina sentupada d'Advent. Nus serimnein **sonda, ils 2 da december 2023** allas 16.00 a Cuoz avon caplutta da s. Giachen e visitein silsuentar comunablamein las ulteriuras finiastras a Buretsch (fontauna), Casa Nauscha (sper via) e sin plaz scola a Segnas. La finizium ha liug el Camp Glaretsch, nua ch'in pign puschegn spetga sin pign e grond. Las quater finiastras san vegnir contempladas entochen Buania.

Vischinadi Segnas Mumpé Tujetsch
